

SI JESUS ANG SALITA



Sa Araling Ito'y Pag-aaralan Mo

Ang Diyos ay Nahayag Kay Jesus

Ang katauhan ng Diyos

Ang damdamin, isipan, at plano ng Diyos

Ang kapangyarihan at kalooban ng Diyos

Ang mga Pangalan ng Diyos ay ipinaliwanag
ni Jesus

Ako Nga

Jehova

Ang Diyos ay Nahayag kay Jesus

Gumagamit tayo ng mga salita upang maghayag ng isipan, upang ipabatid sa iba ang ating damdamin, naisin, at kalooban. Naki-kilala tayo at nauunawaan ng mga tao ayon sa ating sinasabi. Nahahayag ang ating katauhan sa ating mga salita.

Si Jesus ay tinawag na Salita. Inihahayag ng Diyos ang Kanyang sarili sa pamamagitan ni Jesus. Bukod sa pagbibigay sa atin ni Jesus ng mensahe ng Diyos, Siya rin mismo ang mensahe ng Diyos sa atin.

Ang katauhan ng Diyos

Ang Diyos ay espiritu. Hindi natin Siya makikita, maririnig, o madarama ng ating likas na pandamdamin. Paano natin Siya maki-kilala, kung gayon? Paano natin mauunawaan ang Diyos na makapangyarihan sa lahat, sakdal, di nakikita; tayo'y mahina, at makasalanan pa. Paano maipapakita sa atin ng Diyos ang sarili Niya? Si Jesus ang katugunan. Inihahayag ni Jesus ang Diyos sa pamamagitan ng pagkakatawang-tao. Makikilala natin ang Diyos kapag mamasdan natin si Jesus na Anak Niya.

Juan 14:9. Ang nakakita sa akin ay nakakita sa Ama.

Juan 1:18. Kailanma'y walang nakakita sa Diyos, subali't ipinakilala siya ng bugtong na Anak.

Colosas 1:15. Si Cristo ang larawan ng Diyos na di-nakikita.

Ang Diyos ay nagsalita sa mga tao sa maraming paraan, nguni't pinakamalinaw na kakahayagan ng Kanyang katauhan ang Kan-

yang Anak — ang buhay na Salita ng Diyos. Nagsasalita sa atin ngayon ang Diyos kung binabasa natin ang tungkol kay Jesus. Ang buhay, gawain, at mga turo ni Jesus ay nagbadyang lahat ng tungkol sa Diyos, ayon sa karanasan ng tao at sa wikang ating mauunawaan.

Hebreo 1:1,3. Noong una, nagsalita ang Diyos sa ating mga ninuno, sa iba't ibang panahon at sa iba't ibang paraan, sa pamamagitan ng mga propeta. Nguni't ngayon, siya'y nagsalita sa atin sa pamamagitan ng kanyang Anak — sapagka't kung ano ang Diyos ay gayon din ang Anak.

Juan 1:1,14. Sa pasimula pa'y naroon na ang Salita. Ang salita ay kasama ng Diyos at ang Salita ay Diyos. Naging tao ang Salita at nanirahan sa piling natin. Nakita namin ang kanyang kapangyarihan at kadakilaan, puspos ng pag-ibig at katapatan.

Hindi lamang itinuro ni Jesus sa mga tao ang tungkol sa Diyos; ibinadya Niya ang katauhan ng Diyos. Tinukoy Niya ang kabangalan ng Diyos, pati kabutihan, karunungan, kawaan, kapangyarihan, at pag-ibig. Nakita ng mga tao ang mga katangiang ito na Kanyang ibinadya. Inihayag Niya ang pinakamatayog na pamantayang moral at namuhay ayon dito. Namamangha pa rin ang sanlibutan sa napakainam Niyang turo. Sa pamamagitan ng gawa, ipinakilala Niya ang pag-ibig ng Diyos nang paglingkuran Niya ang mga tao at ibinigay ang Kanyang buhay para sa iba.

Nang mamatay si Jesus para sa kasalanan natin, makikita sa krus ang napakalinaw na kapahayagan ng katarungan at pag-ibig ng

Diyos. Kamatayan ang hinihingi ng katarungan ng Diyos. Dahil sa pag-ibig ng Diyos sa mga makasalanan, hinayaang mamatay si Jesus bilang kapalit ng mga makasalanan. Udyok ng pag-ibig, idinalangin pa Niya na patawarin yaong nagpapako sa Kanya sa krus. O! Kay dakilang pag-ibig! Kahangahangang talaga ang ating Diyos!

Ang Gagawin Mo

1. Anong tawag ang ginamit ni Juan kay Jesus sa Juan 1:1-14?
 - a) Ang Kordero ng Diyos
 - b) Ang buhay na Salita.
 - k) Ang Salita.
2. Ayon sa Hebreo 1:1-3, paano nagsalita sa atin ang Diyos sa mga huling araw na ito?
 - a) Sa pamamagitan ng Kanyang Anak.
 - b) Sa pamamagitan ng Kanyang propeta.
 - k) Sa pamamagitan ng kalikasan.
3. Anong uri ng pamantayang moral ang inihayag at isinabuhay ni Jesus?
 - a) Yaong pangkaraniwan sa panahong iyon.
 - b) Ang Pinakamatayog.
 - k) Bagong moralidad ayon sa katayuan.
4. Saan natin makikita ang pinakamalinalaw na kapahayagan ng katarungan, kaawaan, at pag-ibig ng Diyos?
 - a) Sa panalangin ng Panginoon
 - b) Sa sermon sa Bundok.
 - k) Sa krus.

Ang damdamin, isipan, at plano ng Diyos

Ipinahayag ni Jesus ang damdamin, isipan, at plano ng Diyos sa Kanyang pagtuturo at katauhan. Si Jesus ay dakilang Guro gayunman, sinabi Niya:

Juan 8:18. Wala akong ginagawa sa ganang sarili ko lamang; nagsasalita ako ayon sa itinuro sa akin ng Ama.

Juan 15:15. Sinabi ko sa inyo ang lahat ng narinig ko sa aking Ama.

Makaaasa tayo na ang mga itinuro ni Jesus sa ebanghelyo ay tunay na kapahayagan at katotohanan ng Diyos. Nakita nating ang Diyos ay Amang matalino sa lahat at maibigin; inaalagaan Niyang mabuti ang Kanyang mga anak. Namumuhi Siya sa kasalanan at pagkukunwari nguni't minamahal naman ang makasalanan. Sinasabi Niya kung paano tayo maliligtas at binigyan tayo ng panuntunan — para sa maligayang buhay. Ibig Niyang talikdan ng mga anak na naliligaw ang kanilang kasalanan at manumbalik sa Kanya. Ipinabatid Niya sa atin ang tungkol sa kahanga-hangang buhay na inihahanda Niya para sa atin doon sa walang hanggan Niyang kaharian. Nasusulat sa Salita ng Diyos ang mga katotohanang ito.

Si Jesus, ang buhay na Salita, ay naghayag ng damdamin ng Diyos. Sa pamamagitan Niya, tinangisan ng Diyos ang Kanyang mga kaibigan, ang paghihirap ng sangkatauhan, at ang pag-aalinlangan ng mga taong nagtakwil sa Kanya at patungo sa pagkapahamak. Nagalab ang galit ng Diyos laban sa pagkukunwari, panlilinlang, at pangangalakal ng relihiyon. Naawa ang Diyos pagkakita sa mga taong gaya ng tupang walang pastol. Ipinahayag

batid ng Diyos na ibig* Niyang maging mali-gaya sila at walang kasalanan, karamdaman, at kinatatakutan.

Ang Gagawin Mo

5. Ano ang damdaming ipinadama ni Jesus (kalungkutan, galit, tuwa, pagwawalang-bahala, o awa) sa:
 - a) pangangalakal ng relihiyon? . . .
 - b) pagkukunwari at panlilinlang? . . .
 - d) paghihirap ng mga tao? . . .
 - e) pagdadalamhati ng kanyang mga kaibigan? . . .
6. *Isipin mo:* Ano ang nadarama ng Diyos kung minamasdan ang buhay mo?

Ang kapangyarihan at kalooban ng Diyos

Ipinakita sa atin ni Jesus kung ano ang ibig ng Diyos at ang kapangyarihan ng Diyos na isagawa ang Kanyang layon. Ang buhay ni Jesus na masunurin at nakikipag-isa sa Diyos ay nagpapakita sa atin kung anong uri ng buhay ang nais Niyang taglayin natin. Ang mga himalang ginawa ni Jesus ay pawang pagbabadya ng kapangyarihan ng Diyos at ng Kanyang pagnanais na tumulong sa mga tao, anuman ang pangangailangan nila. Sinabi ni Jesus na naparito Siya upang ganapin ang kalooban ng Kanyang Ama. Ito'y nagpapatunay na ibig tayong pagalingin, patawarin ng Diyos, at tugunan ang lahat ng ating pangangailangan ngayon.

Juan 5:36. Ang mga gawang ipinagagawa sa akin ng Ama, at siya ko namang ginaganap — iyan ang nagpapatotoo na akò'y sinugo niya.

1 Corinto 1:24. Si Cristo ang kapangyarihan at karunungan ng Diyos.

Ang Gagawin Mo

7. Isaulo mo ang 1 Corinto 1:24.
8. Ang buhay ni Jesus na lubusang tumatalima sa Diyos at nakikipag-isa sa Kanya ay naghahayag:
 - a) ng panuntunan ng Diyos para sa ating buhay.
 - b) ng kapangyarihan ng Diyos na tumulong doon sa nagsusuko sa Kanya ng kanilang buhay.
 - k) ng kabiguan nating maabot ang pamantayan ng Diyos.
 - d) ng ating pangangailangan ng kapangyarihan ng Diyos upang magawa ang kalooban Niya.
9. Ipinakita sa atin ni Jesus na ibig at magagawa ng Diyos na:
 - a) ang maysakit
 - b) ang makasalanan
 - k) ang mga buhay
 - d) ang lahat nating mga kailangan
10. *Isipin mo:* Ano ang nais gawin ng Diyos para sa iyo? Tutulutan mo ba Siya? Lagyan ng tanda ang mga bagay sa itaas na ginawa na ng Diyos para sa iyo. Sulatah ng X yaong ibig mong gawin Niya ngayon.

Ang mga Pangalan ng Diyos ay Ipinaliwanag ni Jesus


Makikita natin sa Biblia ang maraming pangalan ng Diyos. Si Jesus, ang Salita, ang tumutulong sa atin para maunawaan ang mga ito sapagka't Siya ang tunay na kapahayagan ng Diyos.

Ako Nga

Nang tawagin ng Diyos si Moises para pangunahan ang Kanyang bayan, tinanong ni Moises ang Kanyang pangalan. Sumagot ang Diyos: "Ako yaong si Ako Nga." Sinabi Niya kay Moises na sabihin sa mga tao na sinugo siya ni Ako Nga. Ang ngalang ito'y nagsaad sa atin na walang hanggan, di nagbabago, ang Diyos. Walang pandarayang masumpungan sa Diyos. Ginagawa Niya ang mga bagay na binalak Niyang ganapin. Siya'y maasahan natin.

Nguni't ano nga ba yaong kinakatawan ng Diyos? Ano ang gawain Niya? Sinasagot ni Jesus ang mga ito sa Kanyang pahayag na natala sa Ebanghelyo ni Juan. Walong ulit Niyang ikinapit sa sarili ang pangalan ng Diyos na "Ako Nga." Minsan, ginamit Niya ito upang ilarawan ang Kanyang likas na walang katapusan, nang sabihin Niyang naroon na Siya bago pa si Abraham. Sa ibang pagkaka-taon, ginamit ni Jesus ang pangalang ito ng Diyos upang ipaliwanag ang Kanyang katauhan at ng Diyos — upang ipakita kung ano ang ginagawa ng Diyos para sa bawa't lumlapit sa Kanya. Tutugunin ng dakilang si *Ako Nga* ang lahat ng kailangan natin.

1. "Ako ang tinapay na nagbibigay-buhay." Juan 6:35.
2. "Ako ang ilaw ng sanlibutan." Juan 8:12.



3. "Bago ipinanganak si Abraham, Ako'y Ako Na." Juan 8:58.
4. "Ako ang Pinto." Juan 10:9
5. "Ako ang mabuting pastol." Juan 10:11.
6. "Ako ang muling pagkabuhay at ang buhay." Juan 11:25.
7. "Ako ang daan, ang katotohanan, at ang buhay." Juan 14:6.
8. "Ako ang tunay na puno ng ubas." Juan 15:1.

Ang Gagawin Mo


11. Bakit mahalaga ang mga talatang may *Ako*?
 - a) Ipinaliliwanag nito ang pangalan ng Diyos.
 - b) Ipinakikita nito sa atin ang likas ng Diyos.
 - k) Ipinakikita nito ang magagawa ni Jesus para sa atin.
 - d) Lahat ng nasa itaas nito.
12. *Isipin mo:* Pag-aralan ang mga *Ako* ni Jesus. Talagang ganito ba siya sa iyo? Lagyan ng tanda ang bawat kaugnayan sa talaan na ibig mong malasap kay Jesus. Anu-anong pangangailangan ang natutugunan ni Jesus sa buhay mo ayon sa mga katawagang *Ako*? Ipagpasalamat mo sa Diyos ang kanyang katauhang ito.

Jehova

Ang ibig sabihin ng Jehova ay *Walang Hanggan o Nabubuhay na sa Simula pa*. Itinambal ito sa ibang salita upang bumuo ng mga pangalang pinagsanib. Lahat ng ito'y salig sa personal na kapahayagan ng Diyos at nagsasaad kung sino Siya at kung ano ang ginagawa Niya para sa mga tao. Si Jesus — ang Salitang naghahayag sa atin kung sino ang Diyos — ay nagbabadya ng katotohanan ng mga pangalang ito ng Diyos.

1. *Jehova-jireh* — ang Panginoon ang maghahanda.

Genesis 22:8. At sinabi ni Abraham, Diyos ang maghahanda ng korderong pinakahandog na susunugin.



1 Pedro 1:19,20. Ang itinubos sa inyo'y ang buhay ni Cristo na inihain sa krus. Siya ang Korderong walang batik at kapintasan. Itinalaga na siya ng Diyos sa gawaing ito bago pa nilikha ang daigdig.

Si Jesus ang kordero ng Diyos na inihanda upang tumubos sa ating kasalanan at namatay na kapalit natin.

2. *Jehova-ropheka* — ang Panginoon ang Nagpapagaling

Exodo 15:26. Ako ang Panginoon na nagpapagaling sa iyo.



Mateo 8:16. Pinalayas ni Jesus ang masasamang espiritu at pinagaling ang lahat ng may karamdaman. Si Jesus, ang Dakilang Manggagamot, na nagpapagaling ng katawan, isip, puso, at bagbag na espiritu.

3. *Jehova-salom* — Ang Panginoon ang Ka-

payapaan natin.

Hukom 6:24. Nagtayo roon si Gideon ng isang dambana sa Panginoon, at tinawag na Jehova-salom.

Juan 14:23,27. Sumagot si Jesus
"Kapayapaan ang iniwan ko sa inyo. Ang aking kapayapaan ang ibinibigay ko sa inyo."

Binibigyan tayo ni Jesus ng panloob na kapayapaang di nasasalig sa mga pangyayari — kapayapaan sa Diyos, pansariling kapayapaan, at kapayapaan sa iba.



4. *Jehova-rohi* — ang Panginoong ang aking Pastor.

Awit 23:1. Ang Panginoon ang aking pastor; hindi ako mangangailangan.

Juan 10:7,11. Sinabi ni Jesus . . . "ako ang mabuting pastol. Iniaalay ng mabuting pastol ang kanyang buhay para sa mga tupa."



Si Jesus—ang Mabuting Pastol—ay namatay upang iligtas tayo at nabubuhay ngayon upang pangalagaan ang lahat ng sumusunod sa kanya.

5. *Jehova-tsidkenu* — ang Panginoon ang ating Katuwiran.

Jeremias 23:6. Ito ang pangalan na itatawag sa kanya: **ANG PANGINOON AY ATING KATUWIRAN.**

2 Corinto 5:21. Hindi nagkasala si Cristo nguni't alang-alang sa ating kapakanan, siya'y ibinilang na makasalan upang tayo'y makipag-isa sa kanya at mapabanal sa harapan ng Diyos sa pa-



mamagitan niya. Iisa ang paraan para magkaroon ng malinis na puso't buhay. Makakamtan natin ang maayos na pamumuhay at kagnayan sa Diyos sa ating pakikipag-isa kay Jesus. Siya ang ating katuwiran.

6. *Jehova-shammah* — ang Panginoon ay nasa kasalukuyan.

Ezekiel 48:35. Ang Panginoon ay naroroon.



Mateo 1:22. At tatawagin siyang Emmanuel (ang kahuluga'y "Kasama natin ang Diyos.") Nangako sa atin si Jesus, na lagi siyang sasaatin. Siya'y laging malapit upang tulungan tayo.

7. *Jehovah-nissi* — Ang Panginoon ang ating Watawat.

Exodo 17:15. At nagtayo si Moises ng iisang dambana at pinanganlang *Jehovah-nissi* (Watawat ng Panginoon.)

Juan 16:33. "Mayroon kayong kapighatian dito sa sanlibutan; nguni't lakasan ninyo ang inyong loob! Napagtagumpayan ko na ang sanlibutan!"



Ang ibig sabihin ng tawag na ito'y si Jesus ang ating Tagapanguna, ang ating Tagumpay, at Kalakasan. Kung kasama Siya, lalakas tayo at magtagumpay sa pakikibaka sa buhay.

Ano ang kahulugan sa iyo ng mga pangalang ito? Ito'y tumutukoy na kung si Jesus ang iyong Tagapagligtas, ang Panginoon ang

maghahanda para sa iyo. Pagagalingin ka ng Panginoon. Ang Panginoon ang iyong Kapayapaan. Magiging Katuwiran mo ang Panginoon, kasama mong lagi, at iyong Tagumpay. Ito ang magiging halaga sa iyo ni Jesus, kung isusuko mo sa Kanya ang iyong buhay, ipahahayag ang iyong mga kasalanan, at tanggapin mo Siya sa iyong buhay.

Ang Gagawin Mo

13. Ibigay ang kahulugan ng mga pangalang ito:
- a) Jehovah-jireh
 - b) Jehovah-rophekah
 - k) Jehovah-salom
 - d) Jehovah.rohi
 - e) Jehovah-shammah
 - g) Jehovah-tsidkenu
 - h) Jehovah-nissi
14. *Isipin mo:* Pag-aralan ang bawat katawagang ito kaugnay ng sarili mong karanasan. Nagpakahayag na ba saiyo si Jesus bilang Diyos na naghahanda ng iyong kailangan, nanggagamot, at iba pa? Lagyan ng tanda ang bawat bagay na naranasan mo bilang pansariling pagpapahayag sa iyo ng Diyos. Sulatan ng X yaong ibig mong maranasan ngayon. Idalanganin ito, pasalamatang ang Diyos na nagpahayag sa iyo sa pamamagitan ni Jesus.

Markahan ang iyong mga sagot.

Ika-5 Aralin - Mga Sagot

Ang hinihinging tamang impormasyon ng araling ito'y 22. Mula 20 hanggang 22 ay napakahusay; 16 hanggang 19 ay mabuti; 11 hanggang 15 ay katamtaman. Kung wala pang 11 ang tama, muling basahin ang aralin.

1. k) Ang Salita.
2. a) Sa pamamagitan ng Kanyang Anak.
3. k) Ang pinakamatayog.
4. k) Sa krus.
5. a) Galit, b) Galit, k) Kalungkutan, awa
d) Kalungkutan, awa
e) Kalungkutan, awa
8. a) ng panuntunan ng Diyos
b) ng kapangyarihan ng Diyos
9. a) pagalingin, b) patawarin, k) baguhin, d) ibigay
11. d) Lahat ng nasa itaas nito.
13. a) Jehovah-jireh - Ang Panginoon ang maghahanda
b) Jehova-ropheka - Ang Panginoon ang ating manggagamot
k) Jehovah-salom - Ang Panginoon ang ating Kapayapaan
d) Jehovah-rohi - Ang Panginoon ang ating Pastol
e) Jehova-tsidkenu - Ang Panginoon ang ating katuwiran
g) Jehova shammah - Ang Panginoon ay nasa Kasalukuyan
h) Jehova-nissi - Ang Panginoon ang ating Watawat

Bilang ng mga tamang sagot Antas

Ang Gagawin Mo

Ngayong tapos na ang unang limang aralin, handa ka na para sagutin ang unang bahagi ng iyong TALA NG MAG-AARAL. Pagbalik-aralan ang mga Aralin 1-5. Sundin ang mga alituntunin sa iyong Tala.